

Ioni Ya Iginuma Naona

Buki Taina Wayahina

Tomotau habuhabui ivitumahana buki taina a tau ginuma Sebedi natuna ana wava Ioni, Iesu a tau hae ananina aitam. Tauna mani buki kadu mani leta ginumi *Awaeha Vovouna* taina nihenina.

Ka pai mini leta taina nihenina aitonu. (1) Ioni ya nuanua itoka tau ekalesia Yaubada kadu tauna Natu-hoina Iesu Tau Ito-yavuha nui kavi-yaiane. (2) Ka ya nuanua itoka tau ekalesia mani tau ekalesia kadune-nuanuaiei kadu kadewa-vidovidohei. (3) Ka ya nuanua itoka tau ekalesia nau-vi-avinika leta taina wayahina tau viwavenena vitupu wayahi.

Ioni avaha anamanei viwavenena vitupu ana pata tau ekalesia yai vi-yaiana Yaubada wayahina kadu Iesu wayahina vi-goyoi. Ka kadu anamanei viwavenena vitupu dewa goyona n'-awaehi na-nu ekalesia nihenina.

Tau viwavenena vitupu ivonavona tanopi taina goyona, ka aituhu aviyaivia tanopi taina wayahina ini-awana, dewa goyona vin'-omo de-waia wayahina. Tau vitupu-naia iawaehei Iesu ahihinata. Wayahina, ivitumahana eha ana pata Iesu vi-tomotau itoka tomotau deina. Ka aituhu deina, tauna vi-gawama tanopia. Ka kadu aituhu tauna vi-tomotau, ana pata n'-aniga. Kate tau i eha ivitumahana tauna aniga. Ka

kadu tau vitupu-naia ivonavona eha ana pata ininika ito-yavuha ivaniahei, kate nuaka ana heta ana pata ito-yavuha ivaniahei. Ka aituhu deina, aviani tomotau yai nuanua idedewei inini nihenina, vivane kenene o mani dewa goyona, dewaia eha aitam aviani. Iuna ininika eha aitam aviani Yaubada matana.

Ioni anamanei viwavenena tanoi vitupu. Vona ahiahina, Iesu vi-tomotau, itoka tomotau deina. Ka kadu tauna yan' aniga dewa ananina. Aituhu eha yan' aniga, akanai eha ana pata tauna aniga wayahina na-mini-havine!

Ioni ya nuanua itoka tau ekalesia habuhabuka Yaubada kadewa-vidovidohei, ka kadu tauka nau-wawanika mani tau ekalesia kadewa-vidovidohei.

Yawai Ana Vona

¹ Tuta naona a itoava tuta ataina wayahina, Yawai ana Vona ma'-vavaha. Vonana wayahina aginuginumi wayahimia. Tauna avaha tanihaia anononi, kadu mataia adueyei. Tauna avaha adune-vi-anai, kadu onotona nimaia avo-dadani, ka dewaia avaha anamane-yehai, akanai ataina ahaehaeyei.✧

² Iuna tauna avaha omoi, ka itoai avaha adueyei, kadu ataina ahaehaeyei wayahimia. Nonova Yawai-vavaha ka Amana ainua imamaei, ka munia omo wayahiaia, adueyei. Ka tuta ataina wayahina tauna anaunau-waheyei wayahimia.✧

³ Ka itoai avaha tauna yana dewa adueyei kadue anononi, ka ataina wayahimia ahaehaeyei, e

✧ **1:1:** Ioni 1:1. ✧ **1:2:** Ioni 1:14.

yama nuanua vivane itomi nui kavi-yaiana. Iuna itoai avaha Amaka kadue tauna Natu-hoina Iesu, Tau Ito-yavuha, nui avi-yaiana.

⁴ Wayahina yami leta taina aginuginumi, una-iavi, e un'-anamanei adewa-haiawa-iaua.✧

Yaubada Maheta-hoina

⁵ Ka aitam mataeda Yaubada Natu-hoina wayahina anononi, e ataina amataedami. Ka mataedana taina. Yaubada vivane maheta-hoina, ka eha aitam aviani novanovanina tauna nihenina.✧

⁶ Aituhu novanovanina a papania emamaei, ka aituhu evonavona, “Avaha Yaubada nui avi-niana,” akanai wamke yam vonana vivane vona vitupu, ka eha dewa tunuhina ededewe.✧

⁷ Kate Yaubada maheta a papania mamaei. Wayahina, aituhu maheta a papania tauna nui kamamaei, ana pata habuhabuka kavi-yaiana ahiahina, kadu Yaubada Natu-hoina, vivane Iesu, tauna dayahina hadahadanika yaka goyona aita-moata aitamoata wayahina.

⁸ Aituhu evonavona, “Yauke ahiahiu. Eha aitam dewa goyona ata-dewe,” akanai vonana wayahina taum enonom, ka vona tunutunuhina eha ta-mamae nihenima.✧

⁹ Ka aituhu yaka goyona kahaehaeyei ahiahina, kadu aituhu kanua-vinana dewaia wayahia, akanai Yaubada dewaia goyona aita-moata aita-moata wayahia na-nua-piahika, kadu yaka goyona habuhabuna na-nosi-yavuneyeka. Iuna tuta tuta tauna yana vona ka yana dewa aita-moata,

✧ **1:4:** Ioni 16:24. ✧ **1:5:** 1Ti 6:16; Iam 1:17. ✧ **1:6:** 1Io 2:4.

✧ **1:8:** Sam 32:5; VT 28:13.

ka nonova tauna ya vona-dabadaba boui vivane dewei deina.

¹⁰ Aituhu evonavona, “Eha aitam tuta goyona ata-dewe,” vonana an' anamana vivane, “Yaubada vivane tau vitupu.” Aituhu ededewei deina, Yaubada yana vona eha aitam pai vi-ai yawaim nihenina.

2

Iesu, Yaka Tau Ito-yavuha

¹ Natunatu, adune-nuanuaiemi, ka yami leta taina aginumi omomo wayahimia. Iuna yau nuanua dewa goyona uvihahaiei. Kate aituhu aviyaivia wayahikaia Yaubada ya veimea itana-bwegei, akanai tau nau-wawani inuani yaka tau ivaita mamaei. Tauna Iesu, yaka Tau Ito-yavuha, kadu Tau Tunutunuhina. Kadu tauna Amaka matana ipuipupu-tana-pota wayahika.✧

² Iesu awaeha tomotau tauna inau-vi-anigi. Ka dewana wayahina tauna yaka goyona a dewa-yaiyai epei. Tauna vivane pai vi-nomu a vahitau deina. Ka tauna yan' aniga wayahina yaka goyona wayahi Yaubada nau-patei. Ka nau-patana ana pata itoka yaka goyona wayahi, kadu ana pata tau ma' tanopi habuhabui yai goyona wayahi.✧

³ Ka aituhu Yaubada ya veimea kavi-ateteyei, akanai aka pata kan'-anamaneka vivane avaha tauna kanamane-vidohei deina.

⁴ Kate aituhu aviyaivia ivonavona, “Yauke Yaubada a niam,” ka aituhu eha Yaubada ya

✧ **2:1:** Ebe 7:25-26; 9:24. ✧ **2:2:** Ioni 1:29; Kol 1:20; 1Ito 4:10.

veimea idedewe, akanai tau tau vitupu, ka vona tunutunuhina eha ta-mamae tau nihenia.

⁵ Kate aituhu aviyaivia Yaubada yana vona ivi-ateteyei, akanai apaina tau Yaubada ya dewa-vidovidoha in'-anamane-yehai. Ka medeina aka pata kan'-anamanei itoka Yaubada nihenina kamamaei?✠

⁶ Aituhu aviyaivia ivonavona, “Yauke Yaubada nihenina amamaei,” akanai tau nau-wawani Iesu yana dewa idedewei aitamoata deina.

Veimea Vovouna Wayahina

⁷ Yaiau, adewa-vidovidohemi, ka ataina ami veimea aginumi wayahimia, kate veimeana eha vovouna, kate tutuaina. Tuta naona a itoava tuta ataina wayahina, veimeana wayahimia mamaei. Ka veimeana tutuaina taina avaha unononi, kadu avaha uanamanei.✠

⁸ Ka kadu ataina veimeana aginumi wayahimia, akanai kana-vona vivane veimea vovouna. Ka veimeana kadueyei vivane tunuhina Iesu nihenina, kadu tunuhina itomi nihenimia. Iuna maheta ma'-vavaha avaha vanavana, ka ataina tuta novanovana novonovo.✠

Aituhu Kadewa-vidovidoheka, Maheta Nihena Kamamaei Deina

⁹ Aituhu aviyaivia ivonavona, “Maheta niheniua mamaei,” kate aituhu tau vavanei inau-nikonikoiei, akanai tau yai vona vitupu. Iuna nonova a itoava tuta ataina wayahina, tau novanovanina nihenina imamaei.✠

✠ 2:5: Ioni 14:21, 23. ✠ 2:7: Ioni 13:34; 2Io 5-6. ✠ 2:8: Rom 13:12; Ioni 1:9. ✠ 2:9: 1Io 4:20.

¹⁰ Ka aituhu aviyaivia mahetana nihenina imamaei, tau'i vavanei idewa-vidovidohei. Wayahina, eha aitam aviani goyona tau'i nihenia, e munia vi-pai vito-paine.✧

¹¹ Kate aituhu aviyaivia vavanei inau-nikonikoiei, tau'i novanovana nihenina imamaei, kadu tau'i novanovana nihenina ini-awana. Ka tau'i eha it'-anamane aveta baina ineine, iuna novanovana matai bou-potepotei.✧

¹² Itomi natunatu yaka vitumahana nihenina, kadu adune-nuanuaiemi. Ataina aginuginumi wayahimia, iuna Yaubada avaha yami goyona habuhabuna nua-piahi-neiei Iesu a wavea, iuna tauna ya paisewa wayahina.

¹³ Ka itomi ananiami, ataina aginuginumi wayahimia, iuna itomi avaha tauna uanamanei, ka tuta naona a itoava tuta ataina wayahina tauna ma'-vavaha. Kadu itomi tupunata, ataina aginuginumi wayahimia, iuna avaha Tau Goyogoyona ubagibagi-tawanei, tauna kadu ana wava Satana.

¹⁴ Itomi natunatu, avaha aginumi wayahimia, iuna avaha Amaka uanamanei. Ka itomi ananiami, avaha aginumi wayahimia, iuna avaha tauna uanamanei, e tuta naona a itoava tuta ataina wayahina tauna ma'-vavaha. Kadu itomi tupunata, avaha aginumi wayahimia, iuna itomi bagibagimi, ka Yaubada yana vona nihenimia mamaei, ka kadu avaha Tau Goyogoyona ubagibagi-tawanei.

¹⁵ Eha un'-awaehe tanopi taina nuami n'-epe. Iuna aituhu gugua baina tanopia nuami n'-epe,

✧ **2:10:** Rom 14:13. ✧ **2:11:** Ioni 12:35.

o kadi aituhu tanopi ana dewa nuami n'-epei, apaina Amaka uvi-nua-pania, kadu eha ami pata Yaubada udewa-vidovidohe.✧

¹⁶ Avonemi deina, iuna tanopi ana dewa habuhabui eha Yaubada wayahina ita-vin'-omo, kate ivin'-omo tau ma' tanopi wayahia. Ka tanopi a dewaia vivane tau goyogoyona ai nua-hivahivana, kadu yai nuanua gugua baina tanopia wayahi, kadu yai nua-vane yai gugua wayahi, kadu yai nua-vane tau yai dewa wayahi.✧

¹⁷ Tanopi taina, kadu tau ma' tanopi yai nuanua gugua baina tanopia wayahi eha ima'-vavaha, ka ainua imaimaiova. Ka aituhu aviyaivia Yaubada ya nuanua idewa-nubunubui, akanai tau yawai-vavaha ivaniahei.✧

Yaka Tau Ito-yavuha A Havia Ananina

¹⁸ Natunatu, adune-nuanuaiemi. Ka tuta pai nau-yehata tanopi wayahina avaha omo! Ka nonova mataeda unononi vivane yaka Tau Ito-yavuha a Havia Ananina na-omo. Ka ataina yaka Tau Ito-yavuha a havia habuhabui avaha iomo tanopia, imamaei, kadue itoka kadudueyei. Wayahina, kanamane-vidohei ataina vivane tuta pai nau-yehata tanopi wayahina.✧

¹⁹ Nonova haviaia itoka nui kamamaei, kate tau ini-tawaneka. Aituhu tau tau vitumahana-hoi, akanai tau nau-wawani ataina nui kamamae. Kate avaha yai nae kadueyei. Wayahina, ataina avaha kanamanei tau tau vitupu.✧

✧ **2:15:** Rom 8:7. ✧ **2:16:** Rom 13:14. ✧ **2:17:** Mat 7:21.

✧ **2:18:** Mat 24:5, 24; 2Io 7. ✧ **2:19:** Dew 20:30.

²⁰ Kate itomi eha tau i deina. Iuna Iesu avaha Nuana Ahihinata ito-iwahi wayahimia. Wayahina, tauna nihenimia mamaei, ka habuhabumi avaha nua-uya tunutunuhina uanamanei.✧

²¹ Ka itomi eha mwagemwagemi. Iuna itomi avaha nua-uya tunutunuhina uanamanei. Ka kadu avaha uanamanei vitupu eha aitam tuta vin'-omo dewa tunutunuhina wayahina. Wayahina, yami leta taina aginumi omomo wayahimia.

²² Ka aviyaivia tau vitupu? Tau vitupu Iesu ivi-ebuei, kadu ivonavona, “Iesu eha yaka Tau Ito-yavuha.” Aituhu aviyaivia ivonavona deina, tau i Tau Ito-yavuha a havia. Iuna tau Amaka kadu tauna Natu-hoina ainua ivihahaiei.✧

²³ Ka aituhu aviyaivia ivonavona, “Yauke Yaubada anamanei,” kate aituhu tau i tauna Natu-hoina ivihahaiei, akanai tau i kadu eha Amana it'-anamane, ka kadu Amana ivihahaiei deina. Kate aituhu aviyaivia iawaehei Natu-hoina vivane yaka Tau Ito-yavuha, akanai Iesu tau i nihenia mamaei, kadue Amana kadu tau i nihenia mamaei.✧

²⁴ Itomi udune-vivinimi ahiahina! Kadu avi nua-uya naona unononi ka ataina avaha uvi-tumahanei, akanai nau-wawanimi nua-uyana unua-vi-anai, ka nihenimia upoy'-avini. Aituhu nua-uyana nihenimia mamaei, itomi Amaka kadu tauna Natu-hoina nui uma'-vavaha.

²⁵ Nonova Iesu ya vona-dabadabana veneka, vivane yawai-vavaha kavaniahei.

✧ **2:20:** 1Ko 2:15; 2Ko 1:21; 2Io 2. ✧ **2:22:** 1Io 4:3; 2Io 7. ✧ **2:23:** Ioni 5:23; 1Io 4:15; 5:1.

²⁶ Yami leta taina aginumi wayahimia, iuna yau nuanua tau inono-dadanimi un¹-anamanei.

²⁷ Kate taumi eha tau nono-naia deina. Iesu avaha Nuana Ahihinata ito-iwahi wayahimia. Ka aituhu Nuana Ahihinata nihenimia mamaei, akanai itomi eha nau-wawanimi aitam koiaka un¹-awaehe na-viwavenemi. Iuna Nuana Ahihinata nua-uya habuhabuna viwavenemi, ka tauna ya nua-uya tunutunuhina, eha vitupu. Wayahina, nau-wawanimi tauna ya viwavenena habuhabuna uvi-muni-waiwaiei, e yaka Tau Ito-yavuha nihenina umamaei deina.✧

²⁸ Ika, natunatu, itoka nau-wawanika Tau Ito-yavuha nihenina kamamaei. Aituhu kadewei deina, avi tuta tauna na-mavi-havine, akanai itoka eha yaka matauta nui, kadu eha kana-ini-yauyau tauna matana. Kate tauna ya mavi-havine ana tuta wayahina, itoka aka pata kan¹-ate-vatu kadu kadewa-haiawa matana.

²⁹ Ka avaha uanamanei, yaka Tau Ito-yavuha tunutunuhina. Ka kadu nau-wawanimi un¹-anamanei aituhu aviyaivia dewa ahiahina idedewei, akanai tau Yaubada natunatuna.✧

3

Yaubada Natunatuna

¹ Udu! Amaka dewa-vidovidoheka, ka tauna ya dewa-vidovidoha wayahika ani-vainena! Tauna avaha wayahika ivona, “Tau natunatu”. Wayahina, akanai, itoka vivane natunatuna. Vona ahiahina, tau ma' tanopi eha ai pata yaka

✧ 2:27: Ioni 16:13. ✧ 2:29: 1Io 3:10.

dewa wayahia inua-hau. Iuna tau i eha Yaubada it'-anamane.✧

² Yaiiau, adewa-vidovidohe mi, ka vona ahiahina itoka avaha Yaubada natunatuna. Ka ataina tuta eha kat'-anamane-vidoha tuta muna itoka medeina. Kate avaha kanamanei avi tuta Iesu na-mavi-havine, akanai auyewana wayahina tauna matakaia kadueyei, kadu auyewana wayahina itoka aka dune ka tauna ana dune aitamoata deina.✧

³ Ka aituhu aviyaivia yai nua-vaniaha nui Tau Ito-yavuha ipotepotei, akanai tuta tuta tau i yawai inau-vunavunahi ahihinata, Iesu yawaina ahihinata deina.

⁴ Kate aituhu aviyaivia dewa goyona idewe i, vona ahiahina, tau i Yaubada ya veimea iawa-viaohei. Iuna dewa goyona an' anamana vivane tomotau yai nuanua Yaubada ya veimea itana-bwegebwegei.

⁵ Ka avaha uanamanei, yaka Tau Ito-yavuha omo tanopia, iuna ya nuanua yaka dewa goyona habuhabuna n'-epa-yavune-neiei, kadu avaha uanamanei tauna nihenina eha aitam aviani goyona.✧

⁶ Wayahina, aituhu aviyaivia Iesu nihenina imamaei, tuta tuta tau i eha goyona ita-dewa-nubunubu. Kate aituhu aviyaivia goyona idewa-nubunubui, eha aitam tuta tau i Iesu ita-dueye, kadu eha aitam tuta tau i tauna it'-anamane.

⁷ Natunatu, adune-nuanuaiemi. Eha nau-wawanimi tomotau un'-awaehe inonomi

✧ **3:1:** Ioni 1:12-13; 16:3. ✧ **3:2:** 2Ko 3:18. ✧ **3:5:** Ioni 1:29; 1Pi 2:22-24; 1Io 2:2.

viwavenena vitupu wayahina. Aituhu aviyaivia yai dewa tunutunuhina, akanai tauī tau tunutunuhina, yaka Tau Ito-yavuha tau tunutunuhina deina.

⁸ Aituhu aviyaivia dewa goyona idewa-nubunubui, tauī Satana yana yoko. Iuna tuta naona a itoava tuta ataina wayahina, Satana dewa goyona dedewei. Wayahina, Yaubada Natu-hoina omo tanopia, ka ya nuanua tauna Satana yana dewa habuhabuna na-vita-vovoni.✧

⁹ Aituhu aviyaivia yai tupua vovouna vin'-omo Yaubada wayahina, akanai tauī eha goyona ita-dewa-nubunubu. Iuna Yaubada Nuana tauī nihenia mamaei. Wayahina, tauī eha ai pata goyona idewa-nubunubu. Iuna tauī amai vivane Yaubada.✧

¹⁰ Wayahina aka pata Yaubada natunatuna kadu Satana natunatuna kan'-anamane-vidohei. Aituhu aviyaivia dewa tunutunuhina ivihahaiei, akanai tauī eha Yaubada natunatuna. O kadi deina, aituhu aviyaivia eha vavanei idewa-vidovidohe, tauī eha Yaubada natunatuna.

Kadewa-vidovidoheka

¹¹ Ka tuta naona a itoava tuta ataina wayahina, mataeda taina unononi, e Yaubada ya nuanua aitamoata aitamoata wayahikaia nau-wawanika yaiaka kadewa-vidovidohei.✧

¹² Ka eha nau-wawanika itoka yaka dewa onoto ana wava Kaini yana dewa deina. Tauna Satana natuna, wayahina tauna vaneina vunui, nau-vi-anigi. Ka aviani wayahina tauna vaneina vunui? Kaini tauna vaneina vunui, iuna

✧ 3:8: Ioni 8:44. ✧ 3:9: 1Iō 5:18. ✧ 3:11: Ioni 13:34.

vaneina yana dewa ahiahina, kate tauna yana dewa goyona. Wayahina, Kaini tauna vaneina vi-bwanouei.✧

13 Vavaneiu, aituhu tau ma' tanopi inau-nikonikoieimi, eha nau-wawanimi nuami venau-tamatamana dewana wayahina.✧

14 Itoka kanamanei ahiahina avaha aniga a papani kani-tawanei, kadu avaha yawai-vavaha a papani wayahina kaubo-tamane. Ka medeina kanamanei deina? Iuna itoka yaiaka kadewa-vidovidohei. Aituhu aviyaivia eha yaiiai idewa-vidovidohe, akanai tau aniga a papani nihenina imamaei.✧

15 Ka aituhu aviyaivia vavanei inau-nikonikoiei, akanai tau tau nau-vi-aniga. Ka avaha uanamanei, eha ana pata yawai-vavaha mamae aitam tau nau-vi-aniga nihenina.✧

16 Iesu yaka Tau Ito-yavuha tauna yawaina awaehei, e tauna aniga wayahika. Ka dewana wayahina avaha dewa-vidovidoha an' anamana kan'-anamanei. Wayahina, itoka nau-wawanika kadu yawaika kawaehei kan'-aniga vavaneika wayahi!✧

17 Ka aituhu avi tau kaikaiwabo ai niam yana ma' vitana, kadu aituhu tau kaikaiwabo-naia eha idune-nuanuaiei, medeina Yaubada ya dewa-vidovidoha tau nuai nihenia mamae? Eha ana pata.✧

18 Natunatu, adune-nuanuaiemi. Ka itoka nau-wawanika vavaneika kadewa-vidovidohei

✧ 3:12: Nao 4:8. ✧ 3:13: Ioni 5:18-19. ✧ 3:14: Ioni 5:24.

✧ 3:15: SiV 21:8. ✧ 3:16: Ioni 13:1; Gal 1:4. ✧ 3:17: VV 15:7.

yaka dewa wayahina, kate eha vonata wayahina.✧

Ate-vatu Yaubada Matana

¹⁹ Aituhu vavaneika kadewa-vidovidohei, akanai kan'-anamanei vona tunutunuhina kavi-muni-waiwaiei. Wayahina, avi tuta Yaubada matana kamimini, eha nau-wawanika kamatamatauta. Itoka aka pata aka heta kan'-ate-vatuka, ka kadu nuaka nihenina kan'-awa-vidovidoheka.

²⁰ Ka aituhu avi tuta yaka dewa goyona kanuani, ka aituhu nuaka dewaia goyona wayahina ihaehaeyeka, ka aituhu nuaka iyapoyapoka deina, akanai nau-wawanika kanuani Yaubada nuaka bagibagi-tawanei, ka kadu tauna avaha yaka dewa aitamoata aitamoata anamane-yehai.

²¹ Yaiiau, adune-nuanuaiemi. Ka aituhu nuaka eha iyapoyapoka, akanai aka pata kan'-ate-vatuka Yaubada matana, kadu aka pata kavi-maupwani kaviama wayahina.✧

²² Ka aituhu aviani wayahina kaviama Yaubada wayahina, akanai tauna na-veneka. Iuna tauna ya veimea kavi-ateteyei, kadu itoka yaka dewa ahiahina tauna matana vo-vi-dewa-haiawi.

²³ Ka tauna ya veimea ananina ainua deina. Itoka nau-wawanika Natu-hoina, Iesu Tau Ito-yavuha, kavitumahanei, ka kadu itoka nau-wawanika mani tomotau kadewa-vidovidohei, Yaubada avaha veimeyeka deina.✧

✧ **3:18:** Iam 2:15-16. ✧ **3:21:** Ebe 4:16. ✧ **3:23:** Ioni 6:29; 13:34.

24 Ka aituhu aviyaivia ya veimea ivi-ateteyei, tau i Yaubada nihenina imamaei, kadu tauna tau nihenia mamaei. Ka avaha kanamanei tauna nihenikaia mamaei. Iuna tauna Nuana Ahihinata avaha veneka, e tauna wayahikaia mamaei.✧

4

Nau-wawanika Nua Kanau-dadani

1 Yaiiau, adune-nuanuaiemi, ka avonemi, tau nau-wahe tupwai ivonavona Nuana Ahihinata nihenia mamaei, kadue tau i vonemi tauna ya bagibagi wayahina inaunau-wahe wayahimia. Kate eha nau-wawanimi tau nau-wahe aitamoota aitamoota uvitumahane. Eha. Ka itomi nau-wawanimi naona tau nau-wahe aitamoota aitamoota unau-dadani avi nua nihenina mamaei un'-anamanei. Aituhu nua-nana Yaubada wayahina, akanai tau i yai nau-wahe unononi. Kate aituhu nua-nana eha Yaubada wayahina, akanai tau i yai nau-wahe uvihahaiei. Iuna tau nau-wahe vitupu habuhabui avaha iyavuyavuta tanopia.✧

2 Ka itoka aka pata nua tunina tunina katana-vewani taina deina. Aituhu aviyaivia inau-wahe, ivonavona, “Iesu yaka Tau Ito-yavuha avaha vi-tomotau (itoka tomotau deina), kadu avaha omo tanopia,” tau nau-wahe-naia nihenia Nuana Ahihinata Yaubada wayahina mamaei.✧

3 Ka aituhu aviyaivia inau-wahe, ivonavona, “Iesu eha ta-vi-tomotau,” tau nau-wahe-naia nihenia Nuana Ahihinata Yaubada wayahina eha

✧ 3:24: 1Io 4:13. ✧ 4:1: Mat 7:15; 1Io 2:18; 2Io 7; 1Te 5:21.

✧ 4:2: 1Ko 12:3.

ta-mamae. Kate tau nihenia Tau Ito-yavuha a Havia nuana mamaei. Nonova unononi vivane nua-nana na-omo, ka ataina kadueyei nua-nana avaha omo tanopia ka mamaei.✧

⁴ Natunatu, adune-nuanuaiemi. Ka itomi Yaubada yana yoko, kadu avaha tau nau-wahe vitupu ubagibagi-tawanei. Iuna Nuana Ahihinata nihenimia mamaei, ka tauna bagibagi-vainena. Tau Ito-yavuha a havia nuana tau ma' tanopi nihenia mamaei, kadu tauna bagibagina, kate ya bagibagi eha ani-vainena. Nuana Ahihinata tauna bagibagi-tawanei.✧

⁵ Ka tau nau-wahe-naia vitupu inaunau-wahe tanopi ana dewa wayahina, kadu tau ma' tanopi yai nau-wahena tanoi inononi.✧

⁶ Kate itoai Yaubada natunatuna. Wayahina, aituhu aviyaivia Yaubada ianamanei, akanai tau yama nau-wahe inononi. Ka aituhu aviyaivia eha Yaubada natunatuna, tau eha yama nau-wahe ita-nononi. Wayahina, aka pata Nuana Tunutunuhina kadu nuana goyona katana-vewani kan'-anamanei deina.

Yaubada Vivane Dewa-vidovidoha-hoina

⁷ Vavaneiu adewa-vidovidohemi. Ka itoka nau-wawanika mani tomotau kadewa-vidovidohei, iuna dewa-vidovidoha Yaubada wayahina vin'-omo. Ka aituhu aviyaivia idewa-vidovidoha, akanai tau avaha yai tupua vovouna Yaubada wayahina ivaniahei, kadu tau Yaubada ianamanei ahiahina.

✧ 4:3: 1Io 2:18. ✧ 4:4: Mat 12:29; 1Io 5:4-5. ✧ 4:5: Ioni 8:47; 15:19.

⁸ Iuna Yaubada vivane dewa-vidovidoha-hoina. Ka aituhu aviyaivia eha idewa-vidovidoha, tau eha Yaubada it'-anamane.

⁹ Ka Yaubada avaha tauna ya dewa-vidovidoha wayahika si-vin'-omane kadueyei. Tauna Natu-hoina vi-tune omo tanopia, iuna Yaubada ya nuanua itoka yawai-vavaha kavaniahei Natu-hoina wayahina.✧

¹⁰ Ka dewa-vidovidoha-hoina taina. Nonova itoka eha Yaubada kata-dewa-vidovidohe. Eha-ohota. Kate Yaubada tauka dewa-vidovidoheka. Wayahina, tauna Natu-hoina vi-tune omo tanopia, ka vi-nomuei yaka dewa goyona habuhabuna a nau-pata wayahi.✧

¹¹ Yaiiau, adewa-vidovidohe mi. Ka Yaubada dewa-vidovidoheka ananina deina. Wayahina, itoka nau-wawanika mani tomotau kadewa-vidovidohe mi.

¹² Eha aitam koiaka tau ma' tanopi wayahia Yaubada ita-dueye. Ka aituhu itoka mani tomotau kadewa-vidovidohe mi, akanai Yaubada nihenikaia mamaei, kadu tauna ya dewa-vidovidoha natanata nihenikaia.✧

¹³ Ka Yaubada avaha Nuana veneai. Wayahina, itoai tau hae ananiai avaha anamane-yehai, itoai tauna nihenina amamaei, kadu tauna itoai niheniaia mamaei.✧

¹⁴ Ka itoai avaha Yaubada Natu-hoina adueyei mataia. Wayahina, tauna ahaehaeyei tomotau wayahia. Ka Yaubada tauna Natu-hoina vi-tune

✧ **4:9:** Ioni 3:16. ✧ **4:10:** Rom 5:8-10; 1Io 2:2. ✧ **4:12:** Ioni 1:18.

✧ **4:13:** 2Ko 1:22; 1Io 3:24.

omo tanopia, e Natu-hoina vivane tau ma' tanopi ai Tau Ito-yavuha.

¹⁵ Ka aituhu aviyaivia iawaehei Iesu vivane Yaubada Natu-hoina, akanai Yaubada tau nihenia mamaei, kadu tau Yaubada nihenina imamaei.

¹⁶ Wayahina, itoai avaha Yaubada ya dewa-vidovidoha tauai wayahiai anamanei, ka kadu avaha avitumahanei.

Yaubada vivane dewa-vidovidoha-hoina, ka aituhu aviyaivia dewa-vidovidoha nihenina imamaei, akanai tau Yaubada nihenina imamaei, kadu Yaubada tau nihenia mamaei.

¹⁷ Wayahina, Yaubada ya dewa-vidovidoha natanata nihenikaia deina, ka apaina, nau-yanahi an' auyewa wayahina, eha kamatamatauta, kate kan'-ate-vatuka. Ika, ate-vatuna kavaniahei, iuna itoka yawaika tanopia Iesu yawaina aitamoata deina.

¹⁸ Matauta eha ana pata vin'-omo dewa-vidovidoha wayahina. Iuna dewa-vidovidoha bagibagi-vainena, ka dewa-vidovidoha matauta vo-tahoi. Matauta vin'-omo dewa-yaiyai wayahina. Ka aituhu aviyaivia imatamatauta, tau nihenia dewa-vidovidoha a paisewa eha ta-nau-yehai.

¹⁹ Ka tuta ataina wayahina aitamoata aitamoota wayahikaia kadewa-vidovidoheka, iuna naona Yaubada dewa-vidovidoheka.

²⁰ Ka aituhu aviyaivia ivonavona, "Yauke Yaubada adewa-vidovidohei," kate aituhu tau vavanei inau-nikonikoiei, akanai tau tau vitupu. Iuna aituhu aviyaivia eha ai pata vavanei idewa-vidovidohe, medeina tau ai pata

Yaubada idewa-vidovidohe? Eha ai pata, iuna vavanei avaha idueyei. Wayahina, memeanina idewa-vidovidohei. Kate eha Yaubada ita-dueye, wayahina vitana idewa-vidovidohei.

²¹ Ka Yaubada avaha aka veimea taina veneka. Aituhu aviyaivia Yaubada idewa-vidovidohei, akanai tau nau-wawani kadu vavanei idewa-vidovidohei aitamoata deina.✧

5

Tanopi Kabagibagi-tawanei

¹ Aituhu aviyaivia ivitumahanei Iesu vivane Tau Ito-yavuha, akanai tau avaha yai tupua vovouna Yaubada wayahina ivaniahei. Ka aituhu aviyaivia Amaka idewa-vidovidohei, akanai tau kadu tauna natunatuna idewa-vidovidohei aitamoota deina.✧

² Aituhu Yaubada kadewa-vidovidohei, akanai itoka kadu ya veimea kavi-ateteyei. Wayahina, kan'-anamanei Yaubada natunatuna kadewa-vidovidohei deina.

³ Iuna dewa-vidovidohe Yaubada wayahina an' anamana tauna ya veimea kavi-ateteyei. Ka aka veimea tauna wayahina eha ita-vitaka.✧

⁴ Iuna aituhu aviyaivia avaha yai tupua vovouna Yaubada wayahina ivaniahei, akanai tau tanopi ana dewa ibagibagi-tawanei. Ka medeina ibagibagi-tawanei? Tau yai bagibagi vin'-omo yai vitumahana wayahina.

⁵ Ka aviyaivia ai pata tanopi ana dewa ibagibagi-tawanei? Ai heta tau ivitumahanei Iesu vivane Yaubada Natu-hoina.

✧ **4:21:** Mar 12:29-31. ✧ **5:1:** 1Io 4:15. ✧ **5:3:** Ioni 14:15, 23-24.

Hae Iesu Wayahina

⁶ Ka Iesu Tau Ito-yavuha avaha omo wayahikaia. Tauna omo daudau wayahina, ka kadue tauna omo dayaha wayahina. Tauna eha ta-omo daudau-nana ana heta wayahina. Kate tauna omo daudau-nana dayahina ainua wayahia. Ka kadu Nuana Ahihinata tauna Iesu haehaeyei, iuna Nuana Ahihinata tunutunuhi-hoina.✧

⁷ Wayahina, kadueyei dewa aitonu Iesu ihaehaeyei vivane tauna Yaubada Natu-hoina.

⁸ Dewaia aitonu vivane Nuana Ahihinata, kadu daudau-nana, kadu dayahina. Ka aitonu iawaehei aitamoata.✧

⁹ Aituhu tomotau yai hae kavitumahanei, akanai nau-wawanika Yaubada yana hae Natu-hoina wayahina kavitumahanei. Iuna tauna yana hae bagibagi-vainena.✧

¹⁰ Wayahina, aituhu aviyaivia Yaubada Natu-hoina ivitumahanei, akanai Yaubada ya hae-nana tau nuai nihenia mamaei. Kate aituhu aviyaivia eha Yaubada ita-vitumahane, tau yai dewa wayahina ivonavona, “Yaubada tau vitupu.” Iuna tau avaha Yaubada yana hae Natu-hoina wayahina ivihahaiei.✧

¹¹ Ka ya hae-nana taina. Yaubada avaha yawai-vavaha veneka, ka yawai-vavaha tanoi kavaniahei Natu-hoina nihenina.

¹² Ka aituhu aviyaivia Yaubada Natu-hoina nihenina imamaei, tau avaha yawai-vavaha ivaniahei. Kate aituhu aviyaivia eha Yaubada

✧ **5:6:** Ioni 1:29-34. ✧ **5:8:** Ioni 15:26. ✧ **5:9:** Ioni 5:32-37.

✧ **5:10:** Ioni 5:36-40; Gal 4:6.

Natu-hoina nihenina ita-mamae, tau i eha yawai-vavaha ita-vaniahe.✧

Aviani Yawai-vavaha Wayahina
Kan'-anamanei?

¹³ Ka taumi avaha Yaubada Natu-hoina ana wava uvitumahanei. Wayahina, yauke vonaia aginumi omomo wayahimia. Ka yau nuanua una-iavi, un'-anamane vivane avaha yawai-vavaha uvaniahei.✧

¹⁴ Ka nau-wawanika yaka dewa-haiawa nui kan'-ate-vatu Yaubada matana. Aituhu tauna ya nuanua kadu itoka yaka nuanua aitamoata, avaha kanamanei aviani wayahina kaviama, akanai tauna yaka viama na-nononi, n'-awaeheka.✧

¹⁵ Tuta tuta tauna yaka viama habuhabui nononi, ka avaha kanamanei aviani wayahina kaviamai, akanai tauna n'-awaeheka. Iuna itoka yaka nuanua kadu tauna ya nuanua vivane aita-moata.

¹⁶ Aituhu aitam wayahimia vaneimi yana dewa goyona udueyei, ka aituhu dewa-yaiyai goyo-nana wayahina eha aniga, akanai nau-wawanimi uviama Yaubada wayahina, e Yaubada vaneimi na-nua-piahi, e apaina vaneimi yawaina na-vaniahe-havinei. Aituhu tau dewa goyona idewei ai dewa-yaiyai eha aniga, akanai, viama-nana ana pata.

Ka aitam dewa goyona ma'-vavaha mamaei, ka dewa-yaiyai goyo-nana wayahina vivane aniga.

✧ **5:12:** Ioni 3:36. ✧ **5:13:** Ioni 20:31. ✧ **5:14:** Ioni 14:13-14; 1Io 3:21-22.

Eha nau-wawaniu aveimeyemi dewana goyona wayahina uviama.✧

¹⁷ Vona ahiahina, aituhu Yaubada ya veimea katana-bwegei, dewa-naia aitamoata aitamoata vivane dewa goyona. Ka dewa-yaiyai dewa goyona tupwai wayahia eha aniga.

¹⁸ Ka kanamanei aituhu aviyaivia avaha yai tupua vovouna Yaubada wayahina ivaniahei, tau eha ai pata tuta tuta goyona idewa-nubunubu. Iuna Yaubada Natu-hoina dune-vivini-neiei. Wayahina, Tau Goyo-nana eha ana pata na-vo-dadani-neie, ka tauna eha ana pata tau yawai vi-goyo.✧

¹⁹ Kadu kanamanei vivane itoka Yaubada natunatuna, ka vona-vavaha, aituhu aviyaivia tanopi ana dewa idedewei, tau habuhabui ai tau veimea vivane Satana.

²⁰ Ka kadu kanamanei Yaubada Natu-hoina avaha omo wayahikaia, ka tauna avaha nua-uya veneka. Ka nua-uyana wayahina avaha Yaubada-hoina kanamanei. Wayahina, itoka yawaika Yaubada-hoina nihenina mamaei, kadu yawaika Yaubada Natu-hoina nihenina mamaei. Tauna vivane Yaubada-hoina kadu yawai-vavaha.

²¹ Natunatu, udune-vivinimi! Tuta tuta nau-wawanimi mani yaubada vitupu uvihahaiei. Ana pata deina.

Yauke Ioni

Awaeha Vovouna Minaveha Movia
The New Testament in the Minaveha Language of
Papua New Guinea
Nupela Testamen long tokples Minaveha long Niugini
copyright © 2008 Wycliffe Bible Translators, Inc.

Language: Minaveha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 18 Apr 2025 from source files dated 31 Aug 2023
b67aeef-7e9d-566a-9ff5-cb22ab7e2ea4